

**Muhyiddin Hadir Perjumpaan Bersama Pemimpin BN Sabah
Bernama
1 Mac 2014**

KOTA KINABALU, 1 Mac (Bernama) -- Timbalan Perdana Menteri Tan Sri Muhyiddin Yassin menghadiri perjumpaan khas bersama pemimpin-pemimpin parti komponen Barisan Nasional (BN) negeri di sebuah hotel terkemuka di sini, malam ini.

Muhyiddin yang juga Timbalan Pengerusi BN tiba pada kira-kira 8 malam, diiringi Ketua Menteri Sabah Datuk Seri Musa Aman menghadiri majlis makan malam sebelum perjumpaan tertutup itu yang dijangka berlangsung selama kira-kira dua jam.

Majlis turut dihadiri Naib Presiden Umno Datuk Seri Shafie Apdal, Timbalan Ketua Menteri Sabah yang juga presiden Parti Bersatu Sabah (PBS) Tan Sri Joseph Pairin Kitingan, presiden Parti Bersatu Rakyat Sabah (PBRS) Tan Sri Joseph Kurup, presiden Parti Liberal Demokratik (LDP) Datuk Teo Chee Kang dan pemimpin-pemimpin lain parti komponen BN.

Pada petang tadi, Muhyiddin menghadiri majlis penyerahan Projek Program Perumahan Rakyat (PPR) Sungai Manila di Jalan Labuk, Sandakan.

PPR Sungai Manila setinggi lima tingkat mengandungi 14 blok dengan 1,000 unit rumah pangsa dibina dengan kos sebanyak RM121.7 juta di kawasan seluas 10.591 hektar.

Esok, Muhyiddin dijadual melancarkan Yayasan Hijau (YaHijau) Malaysia di Kompleks Sukan Likas di sini.

Penubuhan YaHijau diumumkan semasa pembentangan Bajet 2014 oleh Perdana Menteri Datuk Seri Najib Tun Razak dengan dana pelancaran sebanyak RM15 juta.

Ia berperanan mempromosi dan meningkatkan kesedaran awam terhadap teknologi hijau dan amalan hijau agar dapat menjadi budaya hidup di kalangan rakyat negara ini.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=1018564>